



Fai 'e Palesiteni Thomas S. Monson

Talitali Lelei ki he Konifelenisí

I he 'etau fanongó, 'ofa 'e ongo ki hotau lotó pea tupulaki 'etau tuí.

S i'i kāinga, 'oku ou fiefia lahi ke talitali lelei kimoutolu ki he konifelenisi ma'ongo'ongá ni 'i he māmaní. 'Oku tau fakataha 'i ha ngaahi feitu'u kehekehe he funga 'o e māmaní ke fanongo mo ako mei he kau tangata mo e kau fafine ne tau hikinima 'i ko e Kau Taki Mā'olunga mo e kau 'ōfisa mā'olunga 'o e Siasí. Kuo nau kolea e tokoni 'a e langí 'i he ngaahi pōpoaki te nau fakahokó, pea kuo nau ma'u ha tataki fakalangi fekau'aki mo e me'a ke lea 'akí.

'Oku faka'ilonga 'i 'e he konifele-nisí ni 'a e ta'u 90 'o hono fakama-fola fakaletiō 'o e konifelenisi lahi. Na'e fuofua fakamafola fakaletiō 'a e ngaahi fakataha'anga 'o e konifele-nisí 'i 'Okatopa 1924, 'i he kautaha KSL 'a e Siasí. 'Oku toe faka'ilonga 'i foki 'e he konifelenisí ni 'a e ta'u 65 hono fakamafola fakatelevīone 'o e konifelenisí. 'I he konifelenisi lahi 'o 'Okatopa 1949, ne fuofua faka-mafola fakatelevīone ai 'a e ngaahi fakatahá 'i he 'ēlia Sōlekí kotoa 'i he televīone KSL.

'Oku tau fakamo'oni 'i e ngaahi tāpuaki 'o e mītia fakaonopōnī 'i

hono fakafaingamālie 'i e kāingalotu 'o e Siasí ke nau mamata mo fanongo ki he konifelenisi lahi. 'Oku fakama-fola e ngaahi fakataha 'o e faka'osinga uike ko 'ení 'i he televīsoné, letioó, keipoló, fetu'utaki fakasatelaité, mo e 'Initanetí, kau ai mo e ngaahi me'a-ngāue to'oto'ó.

Lolotonga 'a e māhina 'e ono talu mei he 'etau fakataha faka'osí, kuo 'osi fakatapui ai ha tempale fo'ou 'e taha pea toe fakatapui mo e taha kehe. Na'e fakatapui 'e Palesiteni Teita F. 'Ukitofa 'a e Tempale Footi Lotateila Folōlitá. Ne fakahoko ha polokalama faiva faka'ofa'ofa 'a e to'u tupú 'i he 'aho kimu'a pea fakatapuí. Na'e fakatapui leva 'a e tempalé 'i he 'aho hono hokó ko e Sāpate 'aho 4 'o Meé, 'i ha sēsini 'e tolu.

Ko haku faingamālie 'i he uike 'e ua kuo hilí ke toe fakatapui 'a e Tempale 'Okiteni 'Iutaá, 'a ia ne fuofua fakatapui 'i he 1972 'e Palesiteni Siosefa Filitingi Sāmita. Ne fakahoko ha faiva fakafonua ma'ongo'onga 'i he 'aho kimu'a pea toe fakatapuí, pea 'i he fu'u tokolahi 'a e to'u tupu ne kau na'e fakahoko leva ha taimi faiva



kehekehe 'e ua, 'o kehekehe 'a e kau faivá. Ko e fakakātoá, ne kau ai ha to'u tupu 'e toko 16,000. Na'e fakahoko 'a e polokalama toe fakatapuí 'i he 'aho hono hokó, pea kau ai ha tokolahi 'o e Kau Taki 'o e Siasí, fakataha mo e kau taki 'o e ngaahi houalotú, palesiteni tempalé, hono ongo tokoní, mo honau ngaahi uaifí.

'Oku kei lele-'i-matangi 'etau langa tempalé. 'E fakatapui 'i he māhina ka tu'ú 'a e Tempale Finiki 'Alesona fo'ou, pea 'i he ta'u kaha'ú, 'i he 2015, 'oku tau 'amanaki ke fakatapui pe toe fakatapui ha tempale 'e nima, pea



mahalo 'e toe lahi ange, kae makatu'unga pē he'enau 'osí.

Hangē ko 'eku fakahā 'i 'Ēpelelí, ka 'osi kotoa hono langa mo fakatapui 'a e ngaahi tempale ne 'osi fanongonongó, 'e 'i ai hatau ngaahi tempale 'e 170 'oku ngāue he funga māmaní. Koe'uhí 'oku mau nofotaha 'i he feinga ke fakahā 'a e ngaahi tempale ne 'osi fakahā ki mu'á, 'oku 'ikai ke mau fakahā ai ha langa 'o ha ngaahi tempale he taimí ni. Neongo ia, ka 'i ai ha ngaahi fie ma'u mo ma'u ha ngaahi kongā kekeleke 'i he kaha'ú, 'e fanongonongo leva ha ngaahi tempale kehe.

'Oku kei tupulekina pē Siasí. Kuo tau fakalaka 'eni 'i he toko 15 miliona tupú pea 'oku kei tupu tokolahi pē. 'Oku kei laka atu ta'e tuka pē 'etau polokalama ngāue fakafaifekau. 'Oku 'i ai ha'atau kau faifekau 'e toko 88,000 tupu 'oku lolotonga ngāue, 'o vahevahe 'a e pōpoaki 'o e ongo-ongoleleí ki he māmaní. 'Oku mau toe fakamahino atu ko e ngāue fakafaifekau ko e fatongia fakataula'eiki ia, pea 'oku mau poupu'u atu 'a e kau talavou mo'ui taau mo malava kotoa pē ke ngāue fakafaifekau. 'Oku tau fakahounga'i foki si'i kau finemui 'oku

ngāue fakafaifekau. 'Oku nau fakahoko ha tokoni lahi fau, neongo 'oku 'ikai ke nau ha'isia ki he fekau tatau ke ngāue 'o tatau mo e kau talavou.

'Oku ou fakaafe'i kimoutolu heni ke mou tokanga ki he kau tangata mo e kau fafine 'e lea he 'ahó ni pea mo 'apongipongi 'i he 'etau ngaahi fakataha 'o e konifelenisí. 'Oku ongo'i 'e kinautolu kotoa ne kole ke leá ko e fatongia lahi ke fai 'eni. Pea 'i he 'etau fanongó, 'ofa 'e ongo ki hotau lotó mo tupulaki 'etau tuí, pea 'oku ou fai 'eni 'i he loto fakatōkilalo, 'i he huafa 'o Sisū Kalaisí, 'ēmeni. ■